

四庫全書

史部

欽定四庫全書

史部

滇畧卷七

詳校官編修

臣曹振鏞

檢討臣德生覆勘

總校官庶吉士

臣倉聖脉

校對官主簿

臣汪日贊

謄錄監生

臣王寶唐

欽定四庫全書

滇略卷七

明 謝肇淛 撰

事略

三代荒服若存若亡文獻不足徵也秦漢故實十不  
得一自唐以降瓜分雲擾淪沒異域孰識之哉明興  
二百五十年來歸命大吏服漢冠裳而蜂蠆之警時  
起於衣袖鴟鵂之習未懷其好音壽張衡命無歲無

之糜縣官金錢無訾算至於今外示舞干中實厝火  
欲求高枕未有期也夫明王馭夷治以不治乃其本  
在自治始慎擇守令將帥無使貪黷擾亂之則幾矣  
周成王初越裳氏獻白雉重譯而至曰吾受命國之黃  
耆曰久矣夫天之無烈風淫雨海不揚波三年矣意  
者中國有聖人乎蓋往朝之及返迷失故道周公錫  
以指南車期年乃至其國

越裳即  
今老撾

春秋時庸與百濮伐楚又麋人率百濮伐楚



周末楚頃襄王使將軍莊蹻將兵循江上略巴黔以西  
至滇池方三百里旁平地肥饒數千里以兵威定屬楚  
欲報會秦擊楚拔黔中郡道塞不通因以其衆王滇  
變服從其俗以長之

秦使常頤略通五尺道頗置吏

漢武帝元狩元年命王然于柏始昌呂越人間出西南  
夷至滇指求身毒國是歲有彩雲見於白崖遣使跡  
之乃置雲南縣

元鼎六年復使王然于以破越及誅南夷兵威風諭滇  
王入朝

元封元年郎中司馬遷奉使西征巴蜀南略邛笮昆明  
還報命

二年以中郎將司馬相如持節開越舊按道侯韓說開  
益州授經教學復遣將軍郭昌衛廣平西南夷未服  
者舉兵臨滇滇王降以為益州郡賜之玉印最寵焉  
六年漢既通西南夷欲前往大夏而昆明閉殺使者奪

幣物於是天子赦京師亡命遣拔胡將軍郭昌將擊之斬首數十萬後復遣使竟不得通

昭帝始元三年姑繒葉榆復反遣水衡都尉呂辟胡作

一作

破胡將兵擊之敗還明年復遣軍正王平大鴻臚田廣明等並進大破之時句町侯亡波同入滇擊反者捕虜有功封為句町王

宣帝五鳳三年遣諫大夫王褒求金馬碧雞之神時方士言益州有金馬碧雞之寶可祭祀而致上使褒往

祠焉時蠻久叛路莫能通乃就蜀巴郡醮祭移文及還道病卒上惜之

成帝時夜郎王興句町王禹漏卧侯俞相攻殺帝遣大中大夫張匡持節和解之句町不服刻木作漢使射之後陳立為牂牁太守誅興禹乃降

王莽時越嶲姑復夷人叛殺略吏民莽遣將軍廉丹發巴蜀卒徒十餘萬擊之不克

光武建武八年渠帥棟蠡姑復牂榆弄棟諸羌叛益州

太守繁勝退保朱提

十九年遣武威將軍劉尚擊諸叛羌平之

二十七年哀牢夷賢栗等率種人詣越雋太守鄭鴻降  
求內屬封為君長

明帝永平元年姑復夷復叛益州刺史發兵討破之斬  
其渠帥傳首京師

十二年哀牢王柳貌率眾內屬以其地置哀牢博南二  
縣割益州郡西部六縣為永昌郡始通博南山度蘭

滄水

十七年白狼夷入貢作詩誦漢功德益州刺史朱輔譯

進之

白狼今麗江也

章帝建初元年哀牢王類牢反太守王尋奔牂榆詔募發夷漢討之

二年昆明夷鹵承等應募率種人與諸郡兵大破類牢於博南斬之封鹵承為破虜傍邑侯時有神鹿兩頭見於點蒼山西能食毒草

元和間神馬出昆明池甘露降白鳥見

和帝永元六年永昌徼外夷遣使譯獻犀牛大象

九年徼外蠻及掸國王遣重譯貢珍寶賜以金印紫綬  
小君長皆加印綬錢帛

安帝永初元年永昌徼外僬僥種夷三千餘口內附獻  
象牙水牛封牛

元初五年卷夷大牛種封離等叛永昌夷皆應之衆至  
十餘萬遣中郎將尹就討之敗績詔徵就還令以兵

屬益州刺史張喬遣從事楊竦至牁榆擊大破之  
封離降

永寧元年揮國王復來貢獻樂及幻人

靈帝熹平五年殺永昌太守曹鸞

後主建興元年益州耆帥雍闓等反殺建寧太守成昂  
三年改益州郡為建寧郡以李恢為太守分建寧永昌  
置雲南郡以呂凱為太守分建寧牂牁置興古郡以  
馬忠為太守丞相諸葛亮南征討雍闓斬之擒孟獲



益州永昌牂牁越雋四郡平即其渠帥用龍佑那為  
酋長賜姓張氏改號建寧

晉惠帝太安元年建寧朱提大姓毛詵等叛南夷校尉  
李毅討破之

二年毛詵等復叛奉建寧太守馬恢為刺史李毅收恢  
殺之而夷愈盛毅疾甚不能出嬰城固守而已

光熙元年寧州刺史李毅卒

懷帝永嘉四年以王遜為南夷校尉寧州刺史滅五苓

夷以地勢形便上分永昌為梁水郡改益州郡為晉  
寧郡從之

明帝太寧元年蜀李雄遣李驤寇寧州王遜遣將軍姚  
岳等擊大破之是年遜卒以其子堅為寧州刺史  
成帝咸和二年寧州秀才龐遺起義兵攻李雄將任回  
李謙等雄遣將羅恒等救之刺史尹鳳遣裨將姚岳  
太守楊術援遺戰于臺登敗績術死之

八年李雄陷寧州

宋文帝元嘉十八年晉寧太守爨松子舉兵反寧州刺史徐循討平之

梁武帝時建寧越雋叛都督王紀撫定之

天監十三年殺寧州刺史李略

太清三年寧州土酋爨瓚據城以叛詔授瓚寧州刺史時侯景方亂不能討也

隋文帝開皇十四年南寧夷爨翫反遣太平公史萬歲討之自青蛉川度西洱河入渠濫川破三十餘部爨

翫降

十八年南寧羌復反萬歲以受賂坐除名

唐高祖武德元年以爨翫子弘達為昆州刺史

四年昆彌遣使內附

七年命韋仁壽檢校南寧州都督寄治越雋仁壽將兵  
循西洱河開地置七州十五縣請徙治南寧州詔可  
太宗貞觀元年以爨歸王為南寧州都督

二十二年命右武衛將軍梁建方討松外諸蠻遣使詣

西洱河諭其帥楊威等皆款降是年西洱河大首領  
楊棟東洱河大首領楊斂皆入朝授官秩冊建寧張  
樂進求為首領大將軍進求尋遜位於蒙氏

高宗永徽元年遣左領軍將軍趙孝祖討白水蠻及大  
勃弄小勃弄大破之虜其酋長楊承顛改雲南縣為  
匡州

四年蒙氏細奴邏遣使入朝賜以錦袍

五年西洱河蒙儉和舍等作亂以李義為姚州道總管

討之斬其帥諾沒弄楊虔柳等諸蠻悉平

顯慶元年西洱河大首領楊棟來附

麟德元年置姚州都督府於昆明之弄棟川

咸亨三年永昌蠻寇邊殺長史李孝讓辛文協詔以太子右衛梁積壽為姚州道行軍總管討平之

調露二年永昌蠻復叛上命李義復總師討之敗績郎將劉惠等戰死乃廢姚州

武太后垂拱四年南蠻郎將王善昆州刺史爨乾福請

復置寧州

延載元年永昌蠻酋董期帥部落二萬戶內附

神功二年蜀州刺史張柬之乞省罷姚州使隸雋州不納

睿宗景雲元年姚州附吐蕃攝監察御史李知古請發兵擊降之增置州縣羣蠻引吐蕃攻知古殺之姚雋路絕

太極元年姚州蠻寇蜀詔靈武監軍右臺御史唐九徵

為姚雋道討擊使吐蕃以鐵絙梁漾濞二水通西洱  
蠻築城戍之九徵毀絙夷城建鐵柱於滇城以勒功  
玄宗開元二年南詔威羅皮遣張健成入朝迺築柘東  
龜城

姚雋蠻寇姚州都督李蒙討之敗沒

三年威羅皮立孔子廟於國中

十七年雋州都督張審素討西南蠻破之克雲南昆明  
城



十八年南詔皮羅閣滅五詔

二十五年皮羅閣陷太和城又襲大釐城據之

二十六年皮羅閣賂節度使王昱求合六詔為一許之  
遣使冊為雲南王賜名歸義徙治太和城

天寶元年南寧州諸蠻叛陷安寧命御史韓洽等督蒙  
歸義討平之

五載歸義遣其孫鳳迦異入朝授鴻臚卿

八載遣特進何履光率十道兵定南詔境

永昌人楊興為蒙氏布燮率所部內附上降璽書褒美  
旌其門世為永昌酋長

九載楊國忠以鮮于仲通為劔南節度使雲南太守張  
虔陀淫虐南詔閣羅鳳忿怨攻殺之取夷州三十二  
十載遣劔南節度使鮮于仲通討南詔戰於西洱河敗  
績大將王天運死之閣羅鳳遂陷雲南僭號大蒙國  
十二載復遣劔南留後李宓擊南詔於西洱河全軍敗  
沒前後死者二十萬人閣羅鳳因陷雋州會同軍據

清溪關以破越析

肅宗至德元載南詔陷越雋

代宗大歷十四年閣羅鳳死孫異牟尋嗣連吐蕃入寇  
神策都將李晟擊破之

德宗貞元元年異牟尋徙居史城僭封五嶽四瀆以點  
蒼山為中嶽烏蒙山為東嶽蒙樂山為南嶽高黎共  
山為西嶽玉龍山為北嶽以黑惠江金沙江澂江瀾  
滄江為四瀆

四年異牟尋徙居羊苴咩城請內附

五年南詔遣烏蠻鬼主夢衡苴聘於劍南節度使韋臯  
求入朝臯遣其屬崔佐時報之盟于點蒼山

九年南詔遣使上表詔冊封雲南王以韋臯為雲南安  
撫使異牟尋遣使楊嘉明詣臯獻夷中歌臯遣幕府  
崔佐時由石門趣雲南復通石門南道

十年臯以南詔兵伐吐蕃大破之取鐵橋十六城俘其  
五王來獻捷異牟尋遣弟獻地圖土貢請復號南詔

詔以袁滋為冊使賜以金印

十一年南詔尹輔酋等隨袁滋入朝九月復獻馬六十

匹

十六年南詔進奉聖樂舞上御麟德殿觀之

憲宗元和十一年南詔勸龍晟為其下弄棟節度使王  
嵯巔所殺立其弟勸利寇安南

穆宗長慶四年始賜勸利印是歲勸利死弟豐祐  
嗣朝廷遣京兆少尹韋審規持節臨冊豐祐遣洪成

酋等入謝

文宗太和三年南詔入寇陷邛戎雋三州東川節度使郭  
釗以鄂岳襄鄧忠武軍伐之又寇成都入其郛遣右  
領軍衛大將軍董質伐之豐祐上表請誅西川節度  
使杜元穎詔貶元穎為循州司馬

四年豐祐遣使請罪

五年西川節度使李德裕索南詔所掠百姓四千人  
六年南詔掠驃國民三千徙之柘東

八年南詔遣使貢方物

武宗會昌六年南詔寇安南經略使裴元裕死之

宣宗大中十二年南詔寇安南陷都護府發朱弩佉苴

助守猶歲朝貢

十三年豐祐死子酋龍嗣朝廷以名近廟諱不行冊禮

酋龍遂僭號改國號曰大禮陷播州

懿宗咸通元年南詔遣清平官董成等詣成都節度使

李福囚之劉潼釋之有詔成等至京師見別殿遣還

二年南詔寇安南攻陷邕州是年九月以左司郎中孟  
穆為南詔弔祭使不果行

四年南詔陷安南經略使蔡襲死之

五年南詔掠雋州西川節度使蕭鄴邀擊大破之又寇邕  
州官軍敗沒

七年嶺南節度使高駢大破南詔復取交趾

八年南詔遣楊酋慶來謝釋董成之囚且歸成都俘三  
千人節度使李師望殺其使



十年南詔入寇陷嘉黎雅三州

十一年攻成都節度副使王建立戰死

十四年陷黔中是年以牛叢為劔南西川節度使南詔  
謾書求入朝假道叢囚其使四十人釋二人還

僖宗乾符元年南詔寇西川陷黎州入邛崃關

二年寇雅州西川節度使高駢檄責之

四年酋龍死子法嗣請和親

六年嶺南節度使辛讜遣使徐雲虔如南詔

廣明元年遣宗正少卿李龜年使南詔與和親

中和三年以宗室女為安化公主妻南詔南詔遣趙隆  
眉楊奇鯤段義宗朝行在高駢上言三人南詔心腹  
宜止而鵬之上從其言隆眉等死蠻遂衰不復振  
昭宗天復二年南詔清平官鄭買嗣奪蒙氏而滅之僭  
號大長和國

後梁乾化四年南詔寇蜀王建發兵大破之

後唐莊宗同光元年南詔以朱髻白馬求婚南漢南漢

以增城公主妻之魏王繼岌齎書招諭南詔

明宗天成元年東川節度使楊干貞殺南詔鄭隆亶立  
侍中趙善政

三年趙善政僭號大天興國干貞尋廢之自立僭號大  
義寧國

後晉天福元年通海節度使段思平討楊干貞干貞走  
死

二年段思平自立僭號大理國居羊苴咩城

三年南詔段思良廢其主思英而自立

宋太祖至道元年南寧酋長龍漢璿貢方物

太宗淳化五年李順亂蜀招安使雷有終遣辛怡顯使

南詔

英宗治平二年蔣波繡雲龍賜等州蠻來貢

波州今劍川雲龍即

今雲龍州也

神宗熙寧九年南詔廉義遣使入貢後為其臣楊義貞

所弑

元豐三年段氏臣高智昇討義貞誅之立廉義之子壽  
輝善闡侯高昇泰廢之立思廉庶孫正明

五年高昇泰廢其主正明而自立

哲宗紹聖元年昇泰僭號大中國昇泰死子泰明以父  
命求正明弟正淳立之號後禮國

徽宗崇寧二年正淳遣高泰運入朝求經籍得六十九

家以歸

按乾道中南詔使者見廣南人言其國有五  
經廣註春秋後語三史加註張孟押韻集聖

歷諸  
書

政和五年廣州觀察使黃璘奏大理求款附

七年南詔遣進奉使天駟爽彥賁李紫琮副使坦綽李伯祥來朝貢馬三百八十匹及麝香牛黃細氈碧圩

山諸物詔冊其主和譽為大理國王

按宋史作段和譽南詔通紀作

段正  
嚴

高宗紹興三年廣西奏大理求入貢卻之

六年廣西經略安撫司奏大理貢象馬詔護送行在所  
優禮答之

孝宗淳熙二年知靜江府張栻令邕管提舉司精選峒丁以制大理

八年大理封其相高護隆子隆政為姚府等三郡演習

演習華言  
牧守也

理宗淳祐元年黎守閭師古言大理請道黎雅入貢安撫使孟珙卻之使道邕廣

四年蒙古攻靈關大理將高禾逆戰敗死

十二年蒙古呼必賚擊大理由臨洮踰吐蕃至麗江所

至望風款附

寶祐元年呼必賚入大理相國高泰祥死之擒其主段興智仍命安輯大理

二年元兵克昆明遂定雲南諸郡以蠻部三十六路四十八甸皆設土官命大理金齒都元帥府統之

元世祖中統元年段興智入朝道卒以子信苴日為總

管守大理

南詔通紀作智興族弟信苴實

至元二年諸蠻部叛信苴日討平之



四年以皇子和克齊為雲南王鎮中慶路

今雲南府

雲南都元帥布呼丹毒殺和克齊王府文學張立道遣

人告變詔逮至皆伏誅

十四年遣信苴日伐永昌之西騰越蒲蠻阿昌金齒未

降部族

十九年遣台布桑阿克達爾率師從金齒征緬

二十五年以雲南王額森特穆爾鎮大理

二十六年始立迤西各路宣慰等司

二十七年以皇孫噶瑪拉為梁王鎮雲南

二十九年改封噶瑪拉為晉王

三十年以皇曾孫松山為梁王

成宗大德五年調雲南軍征八百媳婦雲南土官宋隆  
濟叛

八月遣薛綽爾等兵伐金齒諸蠻

六年宋隆濟攻貴州遣伊蘇岱爾會劉國傑討平之

武宗至大元年以諸王婁丹襲封梁王

梁王伐大理破總管段光兵殺其將高蓬

泰定帝泰定元年封特穆爾布哈為梁王

文宗至順元年雲南諸王圖卜戡叛陷威楚臨安自立為雲南王詔置雲南行樞密院以徹爾特穆爾知院事率師討之

二年雲南平

順帝至正二十三年明玉珍紅巾賊攻雲南總管段功迎擊大破之梁王以女阿結妻功為奏授雲南平章無

何忌而鴆之阿結及從官楊淵海皆從死子段寶嗣

此順帝至正二十三年癸卯年事也  
今志作成宗癸卯差一甲子誤矣

二十七年梁王攻大理不克奏陞段寶為雲南左丞

皇明洪武初段寶遣段真奉表歸款

五年遣翰林待制王禕八年遣中書省參知政事吳雲  
俱招諭雲南梁王不下死之

十四年秋七月命潁川侯傅友德為征南將軍永昌侯  
藍玉西平侯沐英為副總兵征雲南平之梁王投水

死

十五年三月克大理俘段寶二孫遂下鶴慶金齒諸路  
是年六月元布延圖復叛據佛光寨額森布哈陷鄧川  
十月金齒土官高大惠并額森呼圖克構麓川夷入寇  
屠永昌

大理土官高生等叛圍雲南都督郭英討平之

十六年征南將軍傅友德都督郭英擊布延圖大破之  
布延圖自焚死大惠逃為白人所殺

十七年移中土大姓以實雲南是年廣南特磨道作亂  
總兵沐英討平之

十八年段土官復叛指揮李觀討平之

十九年命傅友德耿炳文再征雲南諸蠻平之

二十一年緬蠻叛總兵沐英往討大敗之生獲象四十  
匹而還五月命穎國公傅友德率兵再至雲南討曲  
靖普安孟定龍海曲麻馬乃等處未靖諸蠻

二十二年廣西府阿赤部酋者滿矣情搆越州土酋阿

資以叛西平侯沐英討平之誅者滿矣情獨阿資不獲

二十八年西平侯沐春降越州斬阿資梟其首誅其同惡者一百四十一人

二十九年寧遠州刀拜爛麓川蠻刀干緬俱叛逐宣慰思倫法遣西平侯沐春討之

三十一年夏四月麓川平

永樂元年車里宣撫司土酋刀暹答侵地虜官西平侯

沐晟請討之上勅晟以理告諭還答悔懼還所虜及地遣使入謝

三年遣沐晟征八百大甸平之

四年遣官招諭雲南西南夷大古喇小古喇等部落皆願內屬置宣慰司二長官司五

緬甸攻孟養遣行人張洪持節諭之宣慰使那羅塔遣使謝罪詔宥之

十年封汝南王於大理

後以遠改封今點蒼山無為寺有王碑記



洪熙元年戶部尚書夏原吉上言時政請罷雲南採辦  
金寶數事許之

正統三年麓川酋思任法

法夷言王也志作發誤

反征南將軍黔

國公沐晟討之不克都督方政戰死

晟駐師怒江思任法陽請降晟

信之不進兵方政屢請戰不許政遂與麾下夜往襲其柵破之既而蠻兵大集政求援晟不答一軍俱歿事聞上遣使問罪晟曰我主將也失律在我遂不食至楚雄卒上憐之薄其罪仍賜贈謚遣行人祭政贈威遠伯謚忠毅立祠永昌

五年秋七月廣南維摩師宗沙人儂人作亂都督沐昂

討平之

六年夏五月遣都御史王驥定西伯將貴太監曹吉祥等統東南兵十五萬征麓川思任法逃獲其妻妾象馬寶玉無算時維摩州蠻韋郎羅作亂移師平之還朝封驥靖遠伯貴進侯爵其他陞官職者四百餘員八年秋蔣貴王驥等以征麓川為名再入雲南

九年秋七月緬人獲思任法函其首獻于軍

十三年靖遠伯王驥帥師復征麓川河西學教諭詹英

上章劾其濫行爵賞老師費財乃班師

景泰二年緬人執麓川思機法獻俘

成化十六年遣都御史程宗撫猛密猛密故木邦部落  
也其地有寶井成化初木邦宣慰罕寔淫虐猛密酋  
曩罕弄遂叛投緬既而鎮守太監錢能王舉索寶石  
不得疏於朝請征之罕弄懼重賂大學士萬安遣宗  
撫處宗承安意盡以所略木邦地畀之孟養諸番不  
平洶洶欲亂適弘治改元安宗斥罷副使林俊始割

其地還木邦語具田汝成炎徼紀聞

弘治三年你甸鐵索箐賊作亂官兵討平之

思任法子思祿攻猛密取蠻莫等十七寨遂據孟養

嘉靖五年孟養思倫法攻緬甸破阿瓦城虜其宣慰莽  
紀歲殺略無算遂與木邦底分其地蓋以報執思任  
法之怨也詔遣永昌知府嚴時泰往諭之不聽

六年尋甸酋安銓及武定酋鳳朝文叛圍雲南命兵部  
尚書伍文定討平之

十年巡撫歐陽重以衛軍冒餉銀核之軍士大譟詔罷重官

十九年雲南衛舍人把天持等謀作亂伏誅

二十六年永昌枯柯夷作亂兵備副使韓廷偉撫定之  
二十九年元江土舍那鑑弑其主憲而自立都御史石  
簡討之不克

三十年那鑑殺左布政使徐樾時鑑詐降樾受命往撫  
之入賊境伏發被害官兵從者殲焉詔贈其官逾年

官軍大集鑑乃自殺

是年緬酋莽瑞體據古喇宣慰司殺其酋長遂入孟養

八百老撾

瑞體莽紀歲幼子避思倫法難奔洞吾與古喇相近古喇酋兄弟相攻瑞體和解之

遂部署衆兵絕其道路二酋皆死盡有其地緬自此始強

三十七年木邦宣慰罕拔與隴川宣撫多士寧相讎殺遣指揮路九萬撫之

三十九年東川土酋阿堂與霑益土官安九鼎相攻殺巡撫都御史游居敬集師討之為巡按御史王大任

所劾詔逮居敬赴京下獄論戍

四十年詔取點蒼屏石五十於大理巡撫都御史蔣宗魯奏罷之

四十二年易門賊李向陽等作亂自稱混天大王掠安寧三泊等州縣南安泥叢諸賊響應巡撫都御史呂光洵討平之

四十三年武定酋鳳繼祖叛殺略無算

隆慶元年巡撫雲南尚書呂光洵討武定酋悉平之奏

設流官改治立禦建學作城

六年隴川宣撫司目把岳鳳弑其主多士寧投緬

萬厯元年冬十一月命巡撫侍郎鄒應龍同黔國公沐  
昌祚西征鐵索箐赤石崖擒夷酋羅勤快等七十二  
村悉平

二年春二月復東征毋撲等夷秋八月征蕎甸等夷皆  
平之立營戍守

四年緬大舉攻迤西副使羅汝芳遣兵援之大破其衆



瑞體遁去

七年緬破迤西據之

十年岳鳳以緬兵破干崖執土婦罕氏是年莽瑞體死

瑞體生時值大雪惟瑞體屋上獨無夜所居室奕奕有光及長沈鷲狡譎善用兵信賞必罰故以孑然亡險詐有謀略瑞體併隣拓疆多其力云

十一年緬酋莽應裏糾隴川賊岳鳳寇順寧破施甸猛淋盛達諸寨殺略無算詔以劉綬為遊擊將軍鄧子龍為參將會諸夷兵擊大破之斬岳鳳應裏遁去

十三年羅雄州土舍者繼榮弑其父者濬而自立巡撫都御史劉世曾討誅之初者濬悅營長之婦殺其夫而奪之踰年生繼榮稍長即欲殺父濬幽之十餘年既老無子欲以為嗣釋之出出即據州逐父當事往諭乃佯迎父歸竟弑之招集亡命出劫師宗維摩等州世曾乃遣遊擊將軍劉綎及守備張先聲等合兵討之繼榮敗欲走交趾先聲追斬之奏改羅雄為羅平

十五年應裏復攻迤西陷密堵送速二城兵備按察使  
李材遣遊擊劉天俸擊破之復二城既而巡按御史  
蘇鄭論材上首級不實詔逮材及故永昌知府陳嚴  
之同知宋儒騰越知州陳克侯等下獄材謫戍嚴之  
等皆削籍密堵送速二城雖迤西屬而距永昌遠甚  
酋長思威來告急同知宋儒難之兵備李  
材方喜立功遣天俸等督兵往援天俸亦憚行令把  
總杜斌李朝以少兵往而多以中國旗幟授迤西兵  
緬見謂漢兵大至驚潰思威追擊大破之斬首千餘  
天俸遂以為功報捷材以上聞及驗級則夷兵不知  
取級往返二千餘里半已為有材等遂得罪既而迤  
西遣人貢方物入謝而御史疏業已發乃刪削其表

文以進故  
獄竟具

十七年征緬歸兵作亂討平之初劉鄧二帥入滇多募  
亡賴子弟及西事粗定議令散去人給三金衆以為  
不足官復逼之發遂大譟行劫而東至楊林漆文昌  
往諭賊不聽幽之空室漆從地道出遂合寧州土官  
祿華誥等兵殲之

十八年緬人孟養

二十年緬人蠻莫鄧子龍擊却之

二十一年緬人蠻莫破等練與猛卯多俺分道入寇巡撫都御史陳用賓遣兵擊走之

是年巡撫都御史陳用賓城八關於騰衝曰萬仞曰神護曰巨石曰銅壁曰鐵壁曰虎踞曰天馬曰漢龍每四關設一守備戍之自是緬不敢深入皆廣南知府漆文昌之功也

二十二年擒多俺及其子皆斬之用賓復檄暹羅同攻緬緬疲於犇命自此邊患少息

西韃靼寇臨西麗江知府木旺擊破之

二十五年大候州土酋猛廷瑞叛討平之改置雲州

詔逮參政李先著下獄猛廷瑞之叛也與其妻父奉學  
興兵攻堂兄思賢所過州縣殺掠無算巡撫都御史  
陳用賓疏請征勦遣參將吳顯忠直抵順寧破賊衆  
圍之廷瑞困急乞降而先著聞有旨令廷瑞擒奉學  
自贖遂令撤兵廷瑞得遁入觀音山勢復振顯忠乃  
再集兵討之誅奉學虜廷瑞檻送軍門用賓謂先著

受賄縱賊以狀聞逮下詔獄死

二十六年車里老撾耿馬孟養等各入貢是年遣太監

楊榮開採雲南諸礦

二十七年緬攻孟養官軍往援破走之

二十九年蠻莫酋思正作亂焚掠干崖隴川

三十年緬攻蠻莫思正奔騰越伏誅

三十一年緬酋雍罕遣使款貢

三十三年五宣慰司又為緬所陷

三十四年正月指揮賀世勲梁高門等率衆攻太監楊  
榮殺之焚其屍時榮縱放爪牙四索金寶夷漢洶洶  
又日鞭責諸弁故乘衆怒戮之及其黨百餘人皆死  
事聞詔誅首亂者餘勿問

三十五年隴川宣撫多安民叛歸緬殺鎮撫林承恩十  
一月武定土酋鳳克叛陷郡城脅推官白明通索府  
印遂圍雲南巡撫陳用賓以印予之迺解

是時雲南  
承平日久

武備單弱上下束手無策而賊勢張甚用賓取印於  
藩司布政使薛夢雷持不可既而賊日熾城且不守



竟索印予之及用賓得罪夢雷亦  
以新巡撫解任以其持議不堅也

三十六年正月鳳克陷祿豐殺知縣蘇夢暘又陷元謀  
羅次嵩明等諸州縣殺略無算用賓尋發兵討平之  
俘克等檻送京師既而言者交章論用賓棄印及總  
兵沐畷等失機罪詔遣緹騎逮治及都司張名世武  
定知府陳典推官白明通祿勸知州黃榜俱下獄論  
死用賓在滇十六年其防西事最悉至於建關堡營  
屯田檄邏羅以分緬勢俾騰永之間帖席者二十餘

年功亦懋矣而變起肘腋倉皇失措遂至身名俱殞  
悲夫蓋嘗竊論滇事若游居敬無功而無罪者也李  
材李先著罪少而功多者也用賓功罪相當者也而  
皆身嬰縲紲或以喪軀任事之難不其然乎

三十七年多安民伏誅隴川平是歲雲龍州土官段嘉  
龍縱妻虐夷為族舍段進忠所殺


四十一年蕎甸賊攻宜良知縣龔著擊却之時諸賊皆  
黔國莊丁積年流劫州縣官莫能捕而宜良庠生梅

友竹者亡賴為縣所踪跡遂搆賊至著以死守城募鄉民擊賊破之賊散去捕友竹於通海戮之

四十七年水西賊掠霑益守備方策禦之敗績時烏撒土官安効良娶水西女不相得水西攻之効良逃至霑益賊亦追至扣城索効良方策易之出戰兵寡為所破僅以身免賊遂大掠而去

四十八年雲龍州平段進忠既弑其主時議務羈縻之而進忠愈肆猖獗逼脅州官殺掠無忌於是巡撫中

承召諸道兵欲勦之進忠窘急從間道趨永平至龍  
尾關分守道與大理守謀誘入關而擒之檻送軍門  
散其餘黨數百人疆理其地定賦稅焉



滇略卷七

欽定四庫全書

史部

滇畧卷八

詳校官編修

臣曹振鏞

檢討

臣德生覆勘

總校官庶吉士

臣倉聖脉

校對官主簿

臣汪日贊

謄錄監生

臣王寶唐

欽定四庫全書

滇略卷八

明 謝肇淛 撰

文略

先王之治民也既生聚之衣食之然後洽以文教被以歌謠南中異域日尋干戈生斯地者保要領之不贍而遑聞及雕龍自漢及唐文獻彷彿足徵宋三百年墮羅剎鬼國矣明興而後詞命文告紀載題詠燦

然俱在篇籍不勝汗竹也豈非既富而教王道之成  
哉今擇其較著可以觀者

漢持節使王褒謹拜南崖敬移金精神馬縹碧之雞處  
南之荒深溪回谷非土之鄉歸徠歸徠漢德無疆廣  
乎唐虞澤配三皇黃龍見兮白虎仁歸徠歸徠可以  
為倫歸兮翱兮何事南荒也

漢明帝時通博南山道渡蘭津行者苦之歌曰漢德廣  
開不賓度博南越蘭津渡蘭滄為他人

司馬貞西南夷傳贊西南外徼莊躋首通漢因大夏乃  
命唐蒙勞深靡莫異俗殊風夜郎最大邛笮稱雄及  
置郡縣萬代推功

劉昫西南蠻傳贊五方異氣所稟不同維南極海曰蠻  
與戎惡我則叛好我則通不可不德使其瞻風

晉常璩述南中志赤德中微巨猾干篡白虜乘釁致民  
塗炭爰迄靈獻皇極不建牧后失圖英雄迭進覆車  
齊軌蒙此艱難



隋梁睿請略定南寧州疏竊以遠撫長駕王者令圖易俗移風有國恒典南寧州漢世牂牁之地近代以來分置興古雲南建寧朱提四郡戶口殷衆金帛富饒二河有駿馬明珠益寧出鹽井犀角晉泰始七年以益州曠遠分置寧州至梁刺史徐文盛徵赴荊州土民爨瓚遂竊據一方國家遙授刺史其子震相承至今而震臣禮多虧貢賦不入每奉獻不過數十匹馬其處去益路止一千朱提北境即與戎州接界如聞

彼人苦其苛政思被皇風伏惟大丞相匡贊聖朝寧  
濟區宇裕後光前方垂萬代闢土服遠今正其時幸  
因平蜀士衆即請略定南寧自瀘戎已來軍糧須給  
過此即於蠻夷徵稅以供兵馬其寧州朱提雲南西  
爨並置總管州鎮計彼熟蠻租調足供城防倉儲一  
則以肅蠻夷二則裨益軍國今謹建南寧州郡縣及  
事意如別幅大都督杜神敬昔曾使彼其所諳練今  
并送往

史萬歲征南寧夷過石城山詩云石城門峻誰開闢更  
鼓誤聞風落石界天白嶺勝金湯鎮壓西南天半壁  
唐駱賓王軍中行路難詩君不見封狐雄虺自成羣憑  
深負固結妖氛玉璽分兵徵惡少金壇授律動將軍  
將軍擁旄宣廟略戰士橫戈靜夷落長驅一息背銅  
梁直指三危登劍閣閣道迢迢起戍樓劍門搖曳俯  
靈丘卬關九折無平路江水雙源有急流征役無期  
返他鄉歲月晚杳杳丘陵出蒼蒼林薄遠途危紫蓋

峰路澀青泥坂去去指哀牢行行入不毛絕壁千重  
險連山四望高中外分區宇夷夏殊風土交趾枕南  
荒昆彌臨北戶川原饒毒霧溪谷多淫雨行潦四時  
流崩崖千歲古漂梗飛蓬不暫安捫藤引葛度危巒  
昔時聞道從軍樂今日方知行路難滄江綠水東流  
駛炎州丹徼南中地南中南斗映星河秦關秦塞阻  
烟波三春邊地風光少五月瀘州瘴癘多朝驅疲斥  
堠夕息倦樵歌向月彎繁弱連星轉太阿重義輕生

懷一顧東征西伐凡幾度夜夜朝朝斑鬢新年年歲  
歲戎衣故灞城隅滇池水天涯望轉積地際行無已  
徒覺炎涼節物非不知關山千萬里棄置勿重陳征  
行多苦辛且悅清笳梅柳曲詎憶芳園桃李人絳節  
紅旗分日羽丹心白刃酬明主但令一被君王知誰  
憚三邊征戰苦行路難幾千端無復歸雲憑短翰空  
餘望日想長安

駱賓王姚州道破諾沒弄楊虔柳露布臣聞北辰列象六

合奉天子之尊南面乘乾一統成聖人之業故塗山萬  
國誅後至者防風丹浦一戎緩前禽者就日伏惟陛  
下登翠嫵以握圖居紫微而正象立功不宰混太始  
以凝神至道無名佇華胥而得夢闡文教以清中夏  
崇武功以制九夷反踵穿胸之域襲冠帶以米王奇  
肱僭耳之酋奉正朔而請吏逆賊某浮竹遺嗣沈木  
餘苗邑殊禮義之鄉人習貪殘之性日者皇明廣燭  
帝道遐融輒敢亂我天常率九隆而背誕負其地險

搗七部以稽誅騷亂邊疆敎攘州郡用是三門授律  
長驅無戰之師五月渡瀘深入不毛之地崗巒千里  
西通大荒之郊溪谷萬重南極炎洲之境聳喬林而  
挿月陰鬼有假道之標拔崇巖以隱天陽烏無廻翼  
之地峰危束馬路絕懸車賊据臨代之形乘建瓴之  
勢徵風召雨蝟起蜂飛驅雜種以挺妖封狐千里肆  
沈黎而作孽雄虺九頭臣始廣布皇恩恭宣帝澤申  
之以安撫曉之以存亡信重蠻陬無負黃龍之約賞

隆漢爵不渝白馬之盟地接冉駝詞屢殫于諭蜀俗  
通盤瓠聲不輟于吠堯臣遣某某銜枚遠襲卷甲前  
驅偃危旆而設潛兵疑從天落乘間道而掩不備若  
出地中彎弧而虎黨土崩舉刃而妖徒瓦解雖危若  
沸鼎未窮梟首之誅救死扶傷猶致析骸之爨玄雲  
結陣影密西郊赤堇揮鋒氣衝南斗颶塵埃而匝地  
白日為之晝昏積氛祲以稽天滄溟為之晦色兵交  
刃接鳥散魚驚自卯及申追奔逐北斬首千餘級轉



戰三十里激流膏而為泉似變長弘之血委亂骸而  
擠壑若泛鼈靈之屍既而照盡高春雲昏乙夜賊乃  
收集餘衆保據高巖臣度彼遊魂慮其宵遁使三軍  
齊進四面合圍一鼓先登賞必懸于芳餌九攻按律  
罪無赦于嚴誅五部雄才三河俠少或生居燕地尤  
工即墨之圍或家本秦人早習昆明之戰戰踰百里  
時歷三期前後生擒四千餘人斬首五千餘級諾沒  
弄楊虔柳等殞元行陣懸首旌門蒙儉和舍等委衆

奔馳脫身挺險昔魏臣伐蜀徒聞蒟醬之奇漢使開  
邛纔通竹杖之利豈若膺紫泥而弔伐指丹徼以臨  
戎一戰而孟獲成擒再舉而哀牢授首斯並皇威遠  
暢廟略遐宣奉玄德以配天徒知帝力掩皇興而闡  
地豈曰臣功不勝慶快之至謹露布以聞

又破蒙曉露布臣聞七緯經天星墟分張翼之野八紘  
紀地炎洲限建木之鄉西距大秦襟金莖而孕氣南  
通交趾枕銅柱以為鄰俗帶白狼人習貪殘之性河

淪赤虺川多風雨之妖水積炎氛山涵毒霧竹浮三  
節肇興外域之源木化九隆頗作中國之患年將千  
禩代厯百王鄭純之化不追孟獲之風愈扇三年疲  
衆徒聞定祚之機五月出師未息渡瀘之役伏惟皇  
帝陛下祥螭戴玉拓地軸以登皇道契書繩掩天紘  
而踐帝玄雲入戶纂靈瑞于丹陵蒼錄升壇薦禎圖  
于翠渚六合照臨之地候月歸琛大鑪覆載之間占  
風納賁蠡茲蠻貊敢亂天常橫赤燁以疏疆背朱提

而設險石林萬仞巖邑千重望秦阜以相傾峻陵失  
四塞之阻對梁山而錯峙劒門成一簣之峯不知玉  
弩垂芒涵水無九嬰之沴瑤階舞銑洞庭有三苗之  
墟臣等白招乘候順秋帝以揚旌絳節臨邊遲夜郎  
以解辮營開雋穴旆轉邛門峻岐折坂之危盡亡襟  
帶滇池漏江之固曾失藩籬惟逆賊設蒙瞽等未草  
狼心仍懷承突陸梁放命旅拒偷安地接祠難竟無  
希于改旦山多神鹿終未見于擇音徒開三面之恩

逾肆九頭之暴鳩集餘衆蟻結兇徒儋耳椎髻之徒  
千里霧合鑿齒雕題之孽一呼雲屯於是三略訓兵  
五申誓衆先登陷敵無遺大樹之功後拒亂行必致  
曲梁之罰楚人三戶蜀郡五丁氣擁玄雲精貫白日  
沸殘息于層峰更切守陴之哭積圓顱于重阜殆成  
京觀之封于是乘利追奔因機深入困獸猶鬪似化  
廩君之魂窮鳥尚飛似驚杜宇之魄僵屍蔽野臨赤  
坂而非遙流血灑途視丹微以何遠首領和舍等並

計窮力屈面縛軍門寬其萬死之誅賜以再生之路  
惟蒙瞋脫身挺險負命窮山顧巢穴以靡依逃晷漏  
而何幾况妖徒草面徼外非復他人部落離心舟中  
皆為敵國瞻言梟首指日為期凡在歸降隨事招撫  
張東之請罷姚州疏姚州古者哀牢之國絕域荒外山  
高水深自生人以來泊於後代不與中國交通前漢  
唐蒙開夜郎滇祚而哀牢不附至光武季年始置永  
昌郡以統理之其國西通大秦南通交趾奇珍異寶

進貢歲時不闕諸葛亮五月渡瀘收其金銀鹽布以  
益軍儲使張伯岐選其勁卒勇兵以增武備故蜀志  
稱亮南征而國以富饒甲兵充足由此言之則前代  
置郡其利頗深今金銀鹽布之稅不供珍奇之貢不  
入戈戟之用不實於戎行寶貨之資不輸於大國而  
空竭府庫驅率平人受役蠻夷肝腦塗地臣竊為國  
家惜之漢以得利既多歷博南山涉蘭滄水更置博  
南哀牢二縣蜀人愁怨行者作歌曰歷博南越蘭津

渡蘭滄為他人蓋譏漢貪珍奇鹽布之利而為蠻夷之所馳役也漢獲其利人且怨歌今減耗國儲費用日廣而使陛下之赤子身膏野草骸骨不歸老母幼子哀號望祭於千里之外於國家無絲髮之利在百姓受終身之酷臣竊為國家痛之往者諸葛亮破南中使其渠率自相統領不置漢官亦不留兵鎮守人問其故亮言置官留兵有三不易大意以置官夷漢雜居猜疑必起留兵運糧為患更重忽若反叛勞費



更多粗設綱紀自然久定臣竊以亮之此策妙得羈縻蠻夷之術今姚府所置之官既無安邊靖寇之心又無且縱且擒之技唯知詭謀狡算恣情割剝貪饕劫略積以為常扇動酋渠遺成朋黨折支諂笑取媚蠻夷拜跪趨伏無復慙耻提挈子弟嘯引亮愚聚會蒲博一擲累萬劍南逋逃中原亡命有二千餘戶見散在彼州專以掠奪為業臣恐一朝驚擾為禍轉大伏乞省罷姚州使隸舊府歲時朝覲同之蕃國瀘南

諸鎮亦皆廢於瀘北置關百姓自非奉使入蕃不許  
交通米往增雋府兵選擇清良宰牧以統理之臣愚  
將為穩便

閻丘均成都人與陳子昂杜審言齊名武后時為博士  
罷官流寓南中碑碣多出其手而西爨王碑其所撰  
文也有臨水亭詩相傳為寓蒼洱所作其詞云高館  
基層山幕坐藉芳草傍對野村樹下臨車馬道清朗  
娛心術幽遐備瞻討回合峰隱雲聯綿渚縈島氣似

靈州勝風為青春好相及盛年時無令歎衰老

天寶中王師伐南詔前後敗沒二十萬人李白詩羽檄  
如流星虎符合專城喧呼救邊急羣鳥皆夜鳴白日  
耀紫微三公運權衡天地皆得一澹然四海清借問  
此何為答言楚徵兵渡瀘將五月將赴雲南征又贈  
南陵常贊府詩歲星入漢年方朔見明主調笑當時  
人中天謝雲雨一去麒麟閣遂將朝市乖故交不過  
門秋草日上階當時何特達獨與我心諧置酒凌歊

臺歡娛未曾歇歌動白紵詞舞迴天門月問我心中  
事為君前致辭君看我才能何似魯仲尼大聖猶不  
遇小儒安足悲雲南五月中頻喪渡瀘師毒草殺漢  
馬張兵奪秦旗至今西洱河流血擁僵屍將無七擒  
略魯女惜園葵咸陽天下樞累歲人不足雖有數斗  
酒不如一杯粟賴得契罕衡持釣慰風俗自顧無所  
用辭家方求歸霜驚壯士髮淚滿逐臣衣以此不安  
席蹉跎身世違終當滅衛謗不受魯人譏

儲光義送李宓伐雲南詩昆明瀟滇池蠢爾敢逆常天  
星耀鐵鎖弔彼西南方冢宰統元戎太守齒軍行囊  
括千萬里矢謨在廟堂耀耀金虎符一息到炎荒蒐  
兵自交趾爰舍出瀘陽羣山高嶄巖凌越如鳥翔封  
豕驟跼伏巨象遙披攘迴溪深天淵揭厲踰舟梁玄  
武掃狐蜮蛟龍除方良雷霆隨神兵礪磔動穹蒼斫  
伐若草木繫縲同犬羊除醜飲彌河啁啾亂行藏君  
子惡薄險王師耻重傷廣車設置梁太白收光芒邊

吏靜縣道新書行紀綱劔閣掉勒歸武弁朝建章龍  
樓加命服獬豸擁秋霜邦人頌靈旗側聽河洋洋京  
觀在七德休哉我神皇

高適賀李宓伐蠻歸詩并序天寶十一載有詔伐西南  
夷右相楊公兼節制之寄乃奏前雲南太守李宓涉  
海自交趾擊之道路險艱往復數萬里蓋百王所未  
通也十三載四月至於長安君子是以知廟堂使能  
而李公効節適忝斯人之舊因賦是詩聖人赫斯怒

詔伐西南戎肅穆廟堂上深沈節制雄遂令感激士  
得建非常功料死不料敵顧恩寧顧終鼓行天海外  
轉戰蠻夷中梯巘近高鳥穿林經毒蟲鬼門無歸客  
北戶多南風蜂蠆隔萬里雲雷隨九攻長驅大浪破  
急擊羣山空餉道忽已遠縣度垂欲窮精誠動白日  
憤薄連蒼穹野食掘田鼠晡殮兼餼僅收兵列亭堠  
拓地彌西東臨事耻苟免履危能飭躬將星獨照耀  
邊色何溟濛瀘水夜可涉交州今始通歸來長安道

召見甘泉宮廉藺若未死孫吳知音同相逢論意氣  
慷慨謝深衷按天寶十三載李宓擊南詔閣羅鳳誘  
之深入至太和城堅壁不戰糧盡引還蠻追擊之全  
軍皆沒楊國忠隱其敗更以捷聞其蒙蔽若此而達  
夫乃侈言其功比之廉藺孫吳安得為詩史哉

鄭回者唐西瀘令為南詔所虜以為清平官後卒說異  
牟尋歸唐回有文詞嘗為蒙氏撰德化碑詞繁不具  
載其銘曰降祉自天福流後胤瑞應匪虛禎祥必信



聖主分憂遐夷聲振襲久傳封受符兼印兼瓊秉節  
貪榮構亂開路南安攻殘西巖竹情見屠官師潰散  
賴我先王懷柔伏叛祚不乏賢先獻是繼郡守詭隨  
貶身遐裔禍連虔陀亂深豎髮殃咎匪他塗豕自殪  
仲通制節不詢長久徵兵海隅頓營江口矢心不納  
白刃相守謀用不臧逃師夜走漢不務德而以力爭  
興師命將置府層城三軍往討一舉而平面縛羣吏  
馳獻天庭李宓總戎猶尋覆轍水戰陸攻援孤糧絕

勢屈謀窮軍殘身滅祭而葬之情由故設贊普仁明  
審知機變漢德方衰邊城絕援徵我兵戎攻彼郡縣  
越雋有征會同無戰雄雄嫡嗣高名英烈惟孝惟忠  
乃明乃哲卬瀘一掃軍羣雙滅觀兵尋傳舉國米賓  
巡幸東轡懷德歸仁碧海効祉金穴薦珍人無常主  
惟賢是親土宇克開烟塵載寢轂擊犁坑輯熙羣品  
出入連城光揚衣錦業留萬代之臺倉貯九年之廩  
明明贊普揚干之光赫赫我王實賴之昌化及有土

業著無疆河帶山礪地久天長辨稱世雄才出人右  
信及豚魚潤深瓊玖德以建功是謂不朽石以刊銘  
可長可久

杜光庭以文章教蒙氏之民蒙學士饗泰葬之玉局峰  
麓立廟祠之光庭有詩名如題仙居觀詩往歲真人  
朝玉皇四真三代住繁陽初開九鼎丹華熟繼躡五  
雲天路長烟鎖翠嵐迷舊隱池凝寒鏡貯秋光時從  
白鹿巖前去應許潛通不死鄉又題鴻都觀詩亡吳

霸業已功全深隱雲林始學仙鸞鶴自飄三蜀駕波  
濤猶憶五湖船雙溪夜月鳴寒玉衆嶺秋空歛翠烟  
也有扁舟歸去興故鄉東望思悠然又題都慶觀詩  
三仙一一駕紅鸞仙去雲間遠古壇煉藥舊臺空處  
所掛衣喬木兩摧殘清風嶺接猿聲近白石溪涵水  
影寒二十四峰皆可隱振纓長往亦何難

賈島久寓雲南有送雍陶入蜀詩江山事若諳那肯滯  
雲南草色分危磴杉陰近古潭日斜褒谷鳥夏淺雋

州蠶吾自疑雙鬢相逢更不堪

雍陶成都人寓雲南有送裴璋還蜀詩家在劔門外新年音信稀自為千里客已送幾人歸陌上月初落馬前花正飛離言殊未盡春雨濕征衣時雲南太守張虔陀淫虐南詔殺之遂攻成都陶有哀蜀人為蠻所俘者五首但見城池還漢將豈知佳麗屬蠻兵錦江南渡遙聞哭盡是離家別國聲

又

大渡河邊蠻亦愁

漢人將度盡回頭此中剩寄相思淚南去應無水北

流又欲出鄉關行路遲此生無復却回時千冤萬恨

何人見惟有空山鳥獸知又越雋城南無漢地傷心

從此便為蠻冤聲一動悲風起雲暗青天日下山又

雲南路出洱河西毒草長青瘴色低漸近長城誰更

哭一時收淚羨猿啼

徐凝南詔攻成都詩守隘一夫何處在長橋萬里只堪

傷紛紛塞外烏蠻賊驅盡江頭濯錦娘

劉灣雲南白門詩百蠻亂南方羣盜如蝟起騷然疲中

原征戰從此始白門太和城來往一萬里去者無全  
生十人九人死代馬卧陽山燕兵哭瀘水妻行求死  
夫母行求死子蒼天滿愁雲白骨積空壘哀哀雲南  
行十萬同已矣

馬又蜀中經南蠻俘虜後寄雍陶詩酋馬渡瀘水北來  
如鳥輕幾年期鳳闕一日破龜城此地有征戰誰家  
無死生人悲還舊里鳥喜下空營弟姪意初定交朋  
心尚驚自從經難後吟苦似猿聲

權德輿送袁滋持節冊南詔詩西南使星去遠徼通朝  
聘烟雨棘道深麾幢漢儀盛途經五尺險水愛雙流  
淨上國洽恩波外臣遵禮命離亭駐騶馭且盡尊中  
聖

白居易新豐折臂翁詩新豐老人八十八頭鬢眉鬚皆  
似雪玄孫扶向店前行左臂憑肩右臂折問翁臂折  
來幾年兼問致折何因緣翁云貫屬新豐縣生逢聖  
代無征戰慣聽梨園歌管聲不識旗鎗與弓箭無何



天寶大徵兵戶有三丁點一丁點得驅將何處去五  
月萬里雲南行聞道雲南有瀘水椒花落時瘴烟起  
大軍徒涉水如湯未過十人二三死村南村北哭聲  
哀兒別爺娘夫別妻皆云前後征蠻者千萬人行無  
一回是時翁年二十四兵部牒中有名字夜深不敢  
使人知偷將大石鎚折臂張弓簸旗俱不堪從茲始  
免征雲南骨碎筋傷非不苦且圖揀退歸鄉土臂折  
來經六十年一肢雖廢一身全至今風雨陰寒夜直

到天明痛不眠痛不眠終不悔且喜老身今獨在不  
然當時瀘水頭身死魂孤骨不收應作雲南望鄉鬼  
萬人塚上哭呦呦老人言君聽取君不見開元宰相  
宋開府不賞邊功防黷武又不聞天寶宰相楊國忠  
欲求恩幸立邊功邊功未立生人怨請問新豐折臂  
翁後敬宗時南詔攻梓州劍南郭釗移書責之乃遣  
使入貢居易又有蠻子朝詩蠻子朝泛皮船兮渡繩  
橋來自雋州道路遙入界先經蜀川過蜀將收功先

表賀臣國雲南六詔蠻東連牂牁西連蕃六詔星居  
初瑣碎合為一詔漸强大開元皇帝雖聖神唯蠻倔  
彊不來賓鮮于仲通六萬卒征蠻一陣全軍沒至今  
西洱河岸邊箭孔刀痕滿枯骨誰知今日慕華風不  
勞一人蠻自通誠由陛下休明德亦賴微臣誘諭功  
德宗看表知如此笑令中使迎蠻子蠻子導從者誰  
何摩挲俗羽雙隈伽清平官持赤藤杖大軍將擊金  
呿嗟異牟尋勞尋閣勸待勅召對延英殿上心貴在

懷遠蠻引臨玉座近天顏  
冕旒下垂親勞徠賜衣賜  
食移時對移時對不可得  
大臣相看有羨色可憐宰  
相拖紫佩金章朝日唯聞  
對一刻

元稹賀南詔獻地圖土貢詩  
西南六詔有遺種僻在荒  
陬路尋壅部落支離君長  
賤比諸蕃甸為幽冗犬戎  
彊盛頻侵削降有憤心戰  
無勇夜防抄盜保深山朝  
望烟塵上高冢烏道繩橋  
束款附非因慕化因危悚  
清平官繫金呿嗟求天叩  
地持雙珙益州大將韋令

公頃實遭時定汧隴自居劇鎮無他績幸得蠻米固  
恩寵為蠻開道引蠻朝迎蠻送蠻常繼踵天子臨軒  
四方賀朝廷無事唯端拱漏天走馬春雨寒瀘水飛  
蛇瘴烟重椎頭醜類除憂患瘡足役夫勞洶湧匈奴  
互市歲不供雲蠻通好蠻長駭戎王養馬漸多年南  
人耗賴西人恐

韋臯以南詔兵破吐蕃露布劍南西川節度使同中書  
門下平章事臣臯等言臣聞天討有辜兵應者勝義

者王天佑下民師直為壯曲為老多助之至四極爰  
輳貞觀則同羅擊延陀開元則九姓殄默啜曰商莫  
不來享犯漢雖遠必誅德風翔虜河源武節憺虜月  
蝟率寧人之有指先元戎之啟行用信威光祖宗不  
以賊遺君父恭惟皇帝陛下宣昭義問救寧武功纘  
八葉之鴻圖奮四征之雄略懷梟鴟銷侵殄稟合太  
和翦鯨鯢清郊原掃除羣穢王猶允塞我武惟揚奇  
幹善芳各修貢職條支若木咸順指令邈積石之遐

陬有吐蕃之醜類侵敗王略倍奸齊盟乘邊將之騁  
兵瞰戎亭之虛候為蛇豕食上國盡盜河湟帥蚤賊  
搖我疆再驚畿甸尚納汙而含垢姑通使以結和清  
水之盟未乾好時之師已聚指涇靈而徼賂瞰鹽夏  
以搗虛夷德無厭弗悔枉金之旤楚氛甚惡輒興哀  
甲之謀蠢爾為讎整居匪茹維時南詔慕化中朝先  
零之質諸兒雖嘗并力麋人之率百濮固不離心頓  
顙於邊受命於吏斷匈奴之右臂羈南粵以長纓燕

貉輸致騎之勤晉戎成犄鹿之勢彼既失鐵橋之險  
我遂克峨和之郛蓋竄匿於龍沙復虔劉於麟塞臣  
等請奮其旅以殲乃讎鳳翔振武靈武之騎獵其西  
邠寧太原涇原之兵震其北率南山熊羆之校暨東  
川驅虎之師烏蠻撓其腹心回鶻擣其肘腋衆素飽  
矣一大治之諸將陳泊等統五萬軍出十一道濟師  
西顓之半策勲北陸之初遂賈勇而圍昆明將決勝  
而定青海釋朔方之衆援維州之城九攻九却之計



窮七縱七擒之威速連連執訊矯矯獻囚不然我薪  
而自焚有如破竹之立解拂廬魚潰甌脫鬼莽谷靜  
山空首就焉耆之僂區殲域滅沱聞智盛之降斯皆  
廟謨淵深神斷天造明見萬里運奇堂上之兵守在  
四夷制勝目中之虜勒功滇池之柱植表赤嶺之碑  
一怒安民文之勇也三軍用命克何力焉臣等承帝  
之明敵王所愾開遠門揭候坐牧西極之舊風紫微  
殿受俘重覩崑丘之茂績臣等無任慶快激切屏營

之至謹遣某官奉露布以聞

高駢回雲南牒大唐劍南西川節度使牒雲南詔國我  
大唐聖皇帝德配二儀光齊兩耀仁霑動植聖役神  
龍煦萬國畫若青天養兆民皆同赤子東隣若木西  
屈流沙北通陰山南抵銅柱莫不貢珍納賁航海梯  
山請奉車書願為臣妾是知卑微螢耀不敢並於太  
陽齷齪蹄涔焉能踵於神驥且自象寄鞞譯侯甸要  
荒雖居遠方盡遵中國力爭不得天使其然且以蠟

蝸之飛騰不離溝瀆欲追鸞鳳之羽翼擬接燁霄雖  
是童兒亦知不可且雲南頃者求合六詔併為一番  
與開道塗得接邛蜀許賜書而習讀遽降使而交歡  
禮待情深招延意厚傳周公之禮樂習孔子之詩書  
片善既知大恩合報忽窮兵黷武掠土侵疆再犯朗  
寧重陷交趾兩俘邛蜀一刼黔巫塗炭城池皆為灰  
燼驅歸士庶盡作幽冤凌犯不休貪殘轉甚昔時交  
趾都護不閑理兵舊日朗寧元戎未解誅寇受以侵

欺容其殘暴今日者親征海裔克復龍編驅駕三千  
之師勦除十萬之寇沈白衣殁命之衆如赤日消冰  
殺朱弩佉苴之軍若紅爐熾燄膏塗草莽骸積丘山  
士卒覩之而稱心夷獠觀之而快意其於勝負詔國  
洞知昨日來鎮西川移從汶水仗節而不施導騎單  
車而直抵坤維大開城門放出人物三軍遣歸營幕  
百姓使返鄉閭此時詔王未離近地固無疑阻今則  
已知天時誓雪國耻前詔王遣張棟成等揚言和好

身纔入境兵已繼來况係詔王親行公然詐偽侵欺  
大國榮惑元戎戮僕之儀須依古典其張棟成等並  
已軍令處置今則訓練蕃兵指揮漢將鐵衣十萬甲  
馬五千邕交合從黔蜀齊進昔時漢將有七擒七縱  
之功今日唐臣蘊百戰百勝之術勲名須立國史永  
書是故牒

元楊才照興寶寺碑銘蓋聞率性之謂道妙物之謂神  
混成天地之先獨化陶鈞之上體至虛之宅無毒無

門運不隅之方何自何執出入五物誰測至變之端  
周流六虛旁行大衍之數知大始者由之揆務佐成  
物者宗之致能形象分而變化斯彰動靜常而剛柔  
乃斷玄凝易簡之理昭升久大之功仰觀俯察弗昧  
幽明之宗原始反終遂知生死之說自有達有難保  
於幻夢之常從迷積迷無挽於風浪之起聖寂起虛  
玄覽大覺慧目隨眠澄心墮體弗諼四誓之言末矢  
大千之化觀淨性於日種孰類鄒人驗白髮於脇生

豈匹虹渚昭四門之遠誠忻厭馳而交懷甘六載之  
幽求苦樂審其非道術求舊於遠證之式濟維新於  
所化之生發神足於道場吉祥暫鋪草坐入慈定於  
樹下波旬立惕興尸光縱混園五老頓忘於本制德  
勝火窟三愚遂服於仁風示化橋而摧我人指恒河  
以明生滅大教旁取於五性不化而自行沙輪妙演  
於三時不言而自治相忘照之極耀幽部圓鑒動帝  
聲之大音盲瞶俱拆遂使九十六種貫魚而聽命二

十六品拔茹以成羣闡微座而開大經頒寶藏而振  
諸方莫不十度成敘六趣捐開束名實者息肩於玄  
團尚清淨者同味於大道時來舍衛驚子奉命于祇  
園暫上天宮優王遂興于檀像即穢土以闢淨刹寄  
有相以述真常欲使作三界之歸依為像法之洲渚  
妙哉恍惚無得而稱焉蓋此寺者大蒙知軍事布變  
楊禎之所初也年鍾建極委佐兵機稅蜀衝蕃惟公  
是倚外則弼諧帝道事竭於君內則翼扇真風心忘



於法卜茲勝地初此精藍歲月已淹痛哉圮毀有公  
子高踰城光者曾祖相國明公高大明祖定遠將軍  
高明清考牧公高踰城生者定遠將軍之長子也積  
剛柔之粹德鍾嶽瀆之休靈清明在躬鑑澄波之千  
頃風神絕俗挺巨嶽之萬尋率匡救於明朝善彌縫  
於霸業降德惟忻邁種披恩未殫及人戰則如神鄙  
圯橋之取履政則凝化踵合浦之還珠載折四豪功  
高五霸踰城光數當再索慶襲餘芳天質自殊龍章

特異夙蘊風雲之氣早實仁義之懷和順內凝英華  
外發器茂識環之歲蘭桂有芬志高還洛之年清暉  
自遠敬義無失忠節更堅龍行而異虺吞聲鶚視而  
羣翔鍛翮難不讓於歷試位則退以居謙鬱其千里  
之才擢以百里之命奉旨則仁聲已洽下車則清風  
載興簞食壺漿歌來蘇而滿路逸民傲吏輟考槃以  
登朝乃煦以秋陽威以夏日坐甘棠而聽訟設庭燎  
以思賢振平惠而字小人弘義讓以勗君子民識廉

耻咸習管子之風家足農桑旁畫孟軻之志緝理之  
暇澡德玄源恨不手布黃金幸齊肩于善施日用留  
心白馬庶接武於漢明傷德本之末滋慟斯藍之煽  
燬遂乃俟子來之衆鳩心競之工妙啓新模式仍舊  
貫上棟下宇遂合大壯之宜矢棘輦飛崛起斯干之  
勢窮山水之幽致溢烟霞之佳趣西則松風發夕驚  
聞苦空之音南則江月殘朝忽認靈臺之鏡東臨霧  
闕近接應供之賢北枕平坡遠盼釣鰲之客一一美

麗事事新奇盛矣哉華州之佳境也夫作而不紀非  
盛德焉乃挹儒風粗陳風烈其詞曰率性曰道妙物  
稱神混成天地獨化陶鈞形象乃分剛柔斯判幽明  
迭興生死相換幻夢勿固風浪非常至寂豈默玄覽  
獨章四積弗緩八相斯暇端景固天微鷺衛社四門  
昭戒六載幽求道成樹下法演驚頭驚子標藍優王  
刻像三界歸依羣生瞻仰傳哉此寺肇自楊公心亡  
於法事竭於忠初此德基忽遇煽燬不絕人望挺生

公子明祖靜城顯考廷邊積善餘慶托嗣家庭委事  
天倫敬而無失恭履秋霜友垂冬日難則歷試位乃  
居謙擢以百里德化清廉政理之餘留心喜捨想布  
黃金思題白馬乃仍舊貫式建仁祠於斯盡制大壯  
德宜玄功既擬真珉可紀共彼天長盡善盡美

郭松年印竹寺詩南來作使駐征鞍風景還驚入畫看  
梵宇雲埋筇竹老滇池霜浸碧雞寒兵威此日雖同  
軌文德他年見舞干北望烏臺猶萬里幾回揮淚惜

凋殘

喬堅滇池詩滇水不可涉石戟參嵯峨胡能宅蛟龍但  
可藏龜鼉渚風蕩驚湍乃爾泥滓多我欲澄其源應  
自崑崙阿寸膠諒靡救臨流將奈何商山紫芝曲漁  
父滄浪歌斯人久不作千載無清波又題河尾關驛  
壁二首蒼峰千丈玉槎牙錦樹模糊噪晚鴉濁水難  
將明月浴好山多被亂雲遮村江日落人爭渡旅店  
年豐酒易賒可是災方風景別玄冬開遍野桃花

又

池上蒼山翠作堆池邊花竹映樓臺夜喧燈火庖人  
語地覆松花使客來戰馬不嘶關柝靜哀猿無語瘴  
雲開征衣盡拂紅塵去且向郵亭進酒杯

張翥西蕃箐詩西道出邛僰百里彌箐林晚行不見日  
刺水鬱蕭森伏莽有夷獠巢枝無越禽根盤三嶺險  
氣接四蕃深銀山雪夏白金沙嵐晝霖主恩畀良帥  
時平靖蠻心風威所播掃瘴地空毒淫願言闕南徼  
蔽以樹棠陰

公孫輔入滇益亂後傷懷詩驅馬霑益州南望滇海頭  
向來繁華地變滅如浮漚迴不見人烟但見河水流  
青山宛然在風景何蕭颼郡縣生荆棘汙萊翳田疇  
夜聽虎豹號晝顧麕鹿遊羣鳥集戰壘野燐飛林丘  
灼灼道傍花只為行者愁緬思寇亂際藩垣失防秋  
空虛起外侮口語興戈矛盛衰雖大運禍端亦人謀  
生靈爾何辜吾欲天公尤

李材送楊耀卿使雲南詩飄飄使節出金閨郭隗臺前



暫解攜天入五溪無雁到地經三峽有猿啼子雲舊  
里風烟在太尉家聲日月齊後夜客槎何處望秋河  
迢遞碧雲低又出使雲南留別詩蒼龍雙闕鬱嵒崑  
曾待鷓鴣起早朝往事已隨塵衮衮虛名贏得鬢蕭  
蕭長林豐草空相憶瘴雨蠻烟苦見招借問都門門  
外柳為誰留著最長條

李京過金沙江詩雨中夜過金沙江五月渡瀘即此地  
兩巖峻極若登天下視此江如井裏三月頭九月尾

烟瘴拍天如霧起我行適當六月末王事役人安敢  
避來此滇池至越雋畏途一千三百里干戈浩蕩豺  
虎穴晝不遑寧夜無寐憶昔先帝南征月簞食壺漿  
竟臣妾撫之以寬來以德五十餘年為樂國一朝賊  
臣肆胸臆生事邀功作邊隙可憐三十七部民魚肉  
豈能分玉石君不見南詔安危在一人莫道今無賽  
典赤

明王奎臨安秋江靜釣詩長江西來幾千里白浪飛流

拍天起中有脩鱗長比人不入先生釣竿裏先生襟  
度足與娛直鉤在意不在魚要將清風蕩星斗不與  
怒濤同卷舒昨夜一絲蘸寒月今夜一絲拂飛雪舉  
頭傲睨天地裂目光夜射蛟鼉窟先生釣竿幾許長  
先生經綸千丈强子陵桐江遇文叔尚父渭水逢周  
王江山回首應非故世事茫茫難縷數赤壁天空雁  
不來采石月明鯨已去乾坤上下清絕塵天潢水白  
結冰銀先生有意投竿起歲月無情那待人

史公謹雲南詩城南雙塔高差我城北千山如湧波隔  
斷中原萬餘里耳邊無處聞絃歌我來正值兵戈後  
厭聽邊聲出刁斗壯士沈雄細柳營豈效棘門空赴  
赴金戈鐵馬擁雲霧顧爾羣虎如培塿軍中大將漢  
武侯氣吐虹霓橫素秋七擒七縱平其酋殺氣慘淡  
空中收羣氓趁墟出方物蒟醬作馬隨旄牛蠻語侏  
儻若禽鳥笑聽華言不諳曉縱橫跋扈無尊卑翻覺  
王臣眼中小回首令人憶中國拔劍高歌倚天立碧

雞蒼蒼元氣濕梁王宮殿為荆棘鷓鴣朝鳴猿夜集  
金滿牀頭總何益不如一醉杏花村濯足昆明看山  
色

楊士雲蒼洱圖說蒼洱之景嶂巒萬疊戴雪腰雲如列  
屏十九曲峙於後者點蒼山也波濤萬頃橫練蓄黛  
如月生五日瀦於前者葉榆水也按酈道元水經註  
葉榆水一名洱水西漢於此置益州郡葉榆縣夏秋  
之交山腰白雲宛如玉帶昔人題云天將玉帶封山

公五月積雪未消和蜜餉人頗稱殊絕峰峽皆有懸瀑注為十八溪溪流所經沃壤百里灌溉之利不涖鋤疏春碓用泉不勞人力割山取石白質黑章以蠟沃之則有山林雲物之狀唐相李德裕平泉莊命曰醒酒石香山白侍郎命曰天竺石好事者往往取為牕几之翫郡之方位延庚挹辛賓夕陽而導初月蓋與臨安之西湖洪永之西山嘉之峨眉齊安之臨臯滁之琅邪同一快麗若夫四時氣常如初春寒止於

涼暑止於溫曾無襌襪凍栗之苦此則諸方皆不能  
及也且花卉蔬果迥異凡常島嶼湖波偏宜臨泛一  
泉一石無不可坐風帆沙鳥晴雨咸宜浮圖鉅麗玉  
柱標穹傑閣飛樓連幢萃影翠微烟景陰蔚歲蕤千  
態萬貌不可為喻至其地者使人名利之心消盡崇  
聖鴻鐘聲聞百里諸峰鐘韻遞為連屬滄波漁火滿  
地星辰峽壁澗峰植圭攢劍時有隱君子誅茅其中  
唐人詩云懸燈千嶂夕卷幔五湖秋此語殆為斯地

設也又山水環抱如兩弛弓弓弣交處是名兩關天  
設之險兵燹不及水東磨崖題云此水可當兵十萬  
昔人空有客三千是為奧區奇甸世稱樂土顧僻在  
西陲非宦遊莫至也

李夢陽何子至自滇南詩醉折荷花別寧期花復開川  
原一回首雲日共徘徊知向百蠻去云從三峽來進  
舟雖一賦胡棄楚陽臺

何景明寄黔國公詩萬里山川開百粵十年戎馬暗三



已伏波銅柱衝炎塞橫海樓船出瘴沙鴻雁不傳天  
北字瓊瑤空憶日南華飄飄奉使金門客目斷銀河  
八月槎又平夷二首滇南八月中綠林何萋萋居人  
亦相輳數里聞鳴雞路轉無詰曲山行少攀躋回瞻  
貴陽道咫尺谿壑迷又夜半平夷館風悲氣始淒月  
光皎東壁白露寒蟬啼憑高視中原但覺衆星低長  
路心益壯浩歌天之西又九日黔國後園二首何處  
風烟消客愁將軍臺榭枕山丘一年又過重陽日兩

鬢空悲萬里秋水國陰多寒已至炎方霜後瘴初收  
憑高欲送登臨眼更上池邊百尺樓又天空遠水明  
秋岼梧葉蕭森楓樹殘黃菊數從行處見紫萸獨向  
醉中看浮雲樓觀滇城暮落日山川轆道寒忽憶登  
高去年客慈恩湖閣共憑欄

御史唐龍公署漫興三首草亭春寂寂野性頗相宜井  
近硯池滿雨來書榻移幽花依石發過鳥下簷窺乘  
興入深竹寒光滿素絺又亭上鶯花老風光轉芰荷

如何春日裏都向客鄉過遠海波聲少近山雲氣多  
醉中時慷慨不敢向人歌又洞門鎖清晝一徑落花  
深把酒對山色讀書隨樹陰田園荒舊業松菊憶初  
心細草江城暮愁聞鷓鴣吟又登圓通寺詩物外暫  
招尋惟聞鐘磬音松蘿栖梵影水石定禪心雲去蒼  
崖濕僧歸紫逕深滇池風雨至正好聽龍吟

莆田林俊大理分司詩徙倚近孤松青山隔鄰壁誅茅  
何者家烟花共遊息啟牕日未曛鉤簾月又夕誰將

烟烟心照此幽幽室又蒲縹驛詩草亭動孤酌日歛  
瘴烟昏老屋因風卷清溪帶雨渾桴鼓新聲在山甌  
古意存華門通細火漁唱起江村

僧天祥者不知何許人大理志載其二詩清婉可喜其  
榆城聽角詩云十年遊子在天涯一夜秋風又憶家  
恨殺葉榆城上角曉來吹入小梅花又龍關水樓詩  
此樓登眺好終日俯平湖葉盡村村樹花殘岸岸蘆  
漁翁晴獨釣沙鳥晚相呼何處微鐘動雲藏島寺孤

成都楊慎在滇吟詠至多今摘其尤者滇海曲十二首

梁王閣榭水中央烏鵲雙星帶五潢跨海虹橋三十

里廣寒宮殿夜飄香

又

碧雞金馬古梁州銅柱鐵橋

天際頭試問平滇功第一逢人惟說潁川侯

又

化城

樓閣壯人寰澤國封疆鎮兩關雲氣裝成銀色界天

工斲出點蒼山

又

葉榆巨浸環三島益部雄都控百

蠻神禹導河雙洱水武侯征路七星關

又

沙金水貝

出西荒桃竹槿花貢上方香象渡河來佛子白狼槃

木拜夷王

又

琯房草閣瞰夷庭側鳥懸厓控絕陁雞

足已窮章亥步驚頭空入梵王經

又

孤戍平溪望大

荒邊愁海思入蒼茫帝鄉東北仙雲隔轆道西南媚

景長

又

昆明池水三百里汀花海藻十洲連使者乘

槎曾不到空勞武帝御樓船

又

湖蕩魚蝦晨積場市

橋燈火夜交光油牕洞戶吳商肆羅帕封頤熨婦粧

又

蘋香波暖泛雲津漁樵歌曲水濱天氣常如二

三月花枝不斷四時春

又

煮海醯郎暝漉沙避風仙

客夜乘槎雪浮粳稻壓春酒霞嚼檳榔呼早茶

又海

濱龍市趁春畬江曲漁村弄晚霞孔雀行穿鸚鵡樹  
錦鶯飛啄杜鵑花題捨資驛垂柳篇云楚雄直力橋  
有垂柳一株婉約可愛往來見之賦此志感靈和殿  
前艷陽時忘憂館裏光風吹千門萬戶旌旗色九陌  
三條雨露姿蒼涼苑日籠燕甸縹緲宮雲覆京縣芳  
樹重重歸院迷飄花點點臨池見臨池歸院總仙曹  
應制分題競彩毫詔乘西第將軍馬詩奪東方學士

袍金明綠暗留烟霧舊燕新鶯換朝暮只知眉黛為  
君顰肯信腰肢有人妬從此沈淪萬里身可堪憔悴  
四經春支離散木甘時棄攀折荒亭委路塵搖落秋  
風上林遠婆娑生意華年晚腸斷關山明月樓一聲  
橫笛清霜坂高嶢除夕詩海濱戍旅久忘歸獨對朝  
嵐與夕霏莎徑晴沙采樵路柴門秋水釣魚磯太平  
時節身難遇流轉風光賞莫違街鼓市塵渾隔斷村  
春鄰火自相依寄楊弘山都諫詩螭頭早掛進賢冠



跡遠東墀玉筍班倦意已還飛鳥外歸心原在急流  
間仙郎高議留青瑣學士新詩滿碧山十九峰前同  
醉處夢中瓊樹幾回攀

慎婦黃氏亦有才情慎久戍滇中婦寄一律云鴈飛曾  
不到衡湘錦字何由寄永昌三春花柳妾薄命六詔  
風烟君斷腸曰歸曰歸愁歲暮其雨其雨怨朝陽相  
逢空有刀環約何日金雞下夜郎又黃鶯兒一詞積  
雨釀春寒見繁花樹樹殘泥塗滿眼登臨倦江流幾

灣雲山幾盤天涯極目空腸斷寄書難無情征鴈飛  
不到滇南楊別和三詞俱不能勝

張含金齒孝廉所為詩豪宕悲壯用修亟稱之其詠五  
華臺云五華臺上望昆明淨練微茫似掌平故國欲  
歸歸未得海風山雨一齊生其滇池歌云金標鐵柱  
久銷兵戈甲竿旗起戰聲痛哭冤魂空月色淒風終  
夜弔昆明點蒼書院詩仙佛傳經白玉堂老松無數  
鎖幽香山連海國龍關杳雪擁春城雉堞長萬里衣

冠開六詔百年詞賦效三湘繁臺故事今何在雲日  
徘徊古石梁飲龍津閣詩春日城西獨自遊祇緣攜  
酒得淹留挿天樓閣烟花重汎海魚龍日月浮漢國  
河山真帶礪晉家人物故風流黃鸝恰恰啼深樹吹  
盡東風不解愁寄升菴詩豪吟金馬復連然搨盡韋  
郎五色箋海上風烟俱作客天涯雲物自相憐松涼  
月坐華亭寺花煖春遊碧玉泉一別昆明池上路滔  
滔流水八經年又公子思歸幾歲華王孫芳草遍天

涯樓頭豔曲包明月海口新銘蔡少霞光祿塞遙空  
遞鴈上林枝好正棲鴉夢中記得相尋處東寺鐘殘  
北斗斜

四明張時徹入滇四首天邊來傳客歷險到殊方草長  
知烽息民流屬歲荒巖花薰澗壑木葉墮衣裳何事  
秋風起愁看白髮長

又

山路日多雨我行猶未休碧

溪雲不定青草瘴仍浮客久旌旄落天空鵲鶴秋卜

居何以賦長嘯驛吳鉤

又

寒燠經時變浮踪不自由

迢迢望鄉邑歷歷見林丘紫澗屋頭出白雲巖際流  
眷言霞卧者即鹿諒非謀又雲起千峰失猿鳴清晝  
陰褰帷從霧入度隴病泥深石出泉流戰橋低野竹  
侵桑弧自有事偏動故鄉吟

銅梁張佳胤督學滇中多所題詠其望中和山云古城  
東北望蒼翠隱芙蓉臺殿星辰近雲門日夜封紫烟  
和瘴癘大壑度霜鐘寄謝緱山侶將因跨白龍入滇  
城云西南天盡見雄都氣象中原自不殊山削芙蓉

青並出日銜湖水色平鋪觀風到處周藩服建節何  
人漢大夫偶向碧雞祠下問那知神物至今無自漾  
備趨金齒云五月江聲走白沙沙邊石氣盡雲霞峰  
陰寒積何年雪瘴雨香生古樹花獨立南荒成萬里  
每憑北斗問三巴蘭津已說明朝渡絕域虛疑漢使  
槎詠瀾滄橋云疊嶺遙知萬馬愁蘭津西渡赤虹浮  
鼉鼉駕浪聲齊動鳥雀飛梁影並收纜束長江標絕  
壁天懸雙鏡照中流當時漢卒勞歌地翻石於今作

壯遊署中秋懷四首吏隱常依一畝宮  
案頭幽鳥坐  
秋風樓高散帙青天上  
露滴繁花綠樹中小  
隱會心  
無遠近轉蓬隨地可  
西東虛慙絳帳橫  
經日空使諸

生侍馬融

又

瘴海西南日月偏  
秋空高落五華烟  
寰

中足路將無遍  
江上茅堂亦可憐  
滇水向來龍馬窟

昆明不見漢樓船  
系孤本是男兒事  
矯首風雲北斗

邊

又

蕭颯孤城木葉秋  
日南天畔好登樓  
尊開黃菊

香堪把峰擁朱欄  
翠不收詞賦何如金馬使  
歌鐘亦

接武陽侯羈棲獨抱雙龍匣風雨常令海上愁

又偃

蹇平生鬢欲絲向來投賦弔湘纍乘時提掇聊三仕

落日褰帷更九夷霄漢獨存鴻鵠志秋風吾愛桂花

枝一從鄴下論交定白眼逢人祇自疑又金齒道中

雜詩十首叱馭何如鳥道難無名花向野林看萬山

飛瀑雲齊落多少征人五月寒

又

古驛樓高雷雨鳴

春山無恙夏雲生愁來江漢人千里落日風傳布穀

聲

又

萬峰深處打牛聲父老猶能說孔明一自渡瀘



鳴土鼓南中何地不桑畊又橫嶺雲盤曲礪多芙蓉

隨杖轉差我泉聲百道凌天出云是西南九渡河又

諸夷村落萬峰中駐牧分明漢俗同聞道近來租調

苦安邊誰念昔時功又漾備江深江草齊江花開處

鷓鴣啼博南矯首青堪摘霞氣猶懸萬嶺西又江濤

吹轉大滄東日月雙扶駕海虹千尺銀鐺驚不渡飛

梁虛掛赤霄中又寒濤齊響萬松枝立馬空山拾紫

芝何處夷歌聽不斷迎神或是竹王祠又高臺曾是

漢時營千載天威尚有名日暮九隆何處望夏雲飛  
滿不韋城又千山忽盡見哀牢野闊天空俯佩刀風  
雨驟隨遊客到雷聲吹散大江濤

督學鄱陽童軒有鶴慶道中詩巖深多險阻馬足正凌  
兢暝雪依巢鳥斜陽歸寺僧林疎鳴敗葉澗古積堅  
冰去去無辭遠荒山更幾層又祿脰驛詩京國雲山  
遠悠悠入夢思頻年縻薄宦何日是歸期魚鴈音書  
斷風霜道路遲牕前殘月白起視夜何其

歷下李攀龍送豐城杜少府謫滇南詩共惜投荒萬里  
天當朝起草事空傳主恩綠鬢神仙尉客夢青雲侍  
從年盤水秋帆開瘴癘黔陽春樹隔風烟孤臣自有  
豐城劍遙夜思家向斗邊

嶺南黎民表送人之騰越詩北闕秋風綰郡章單車人  
自識循良長途正渡瀾滄水清吏休論寶玉鄉行笥  
護衣無越艷硿房稽首有夷王漢家不事西南徼叩  
竹無勞貢上方

方伯陳時範碧雞闕詩繡壁倚天雞巖枝濕翠低神仙  
傳漢使驛路控雕題為客關山遠傷心骨肉攜王孫  
芳草處惆悵欲淒迷又秋日集太華晚陟羅漢寺詩  
雨霽空江靜不流夕陽霞頂宴高秋漢家金馬開南  
詔聖世昆明入兗州關塞極天豺虎息河山萬里鳳  
麟遊天王朔雪炎風地真覺車書奉冕旒

吳郡皇甫汭曹溪寺詩驚影知何處螳川去不遙仙巖  
鐘夜月金水漢時潮浴罷衣聊振風停幡屢飄遠公

一相謝乘醉下溪橋又過呂合驛題仙人骨詩昔人  
自羽化孤骨尚安存青塚藏金藥難招緱嶺魂

豫章姜忻參知過蒲陀崆詩蒼洱西頭路秋來幾往還

一村三度水十里九重山僧寺多依嶺人家半雜蠻

廿年成底事巖險苦躋攀又自蒲縹驛題龍川詩凌

晨發蒲縹向夕憩龍川渡口水初落山頭花已然邊

城閒戍鼓墟里起炊烟更聽與人語村村大有年

吳興徐中行入滇二首蒼然平楚望云是古滇疆白日

開南微青天豁大荒河山猶內地花木自殊方吹盡  
浮雲色雄風萬里長又一出夜郎道纔看曉日生風  
聲連海壯地勢入滇平氣色開金馬烟花滿石城寄  
言張博望此去可橫行又登太華山觀昆明池詩陰  
陰松栢隱香臺的的晴波萬頃迴仙掌遠從西嶽出  
神池忽似上林開鏡中斜日搖金剝天外飛霞送酒  
盃共憶樓船曾賜宴新詩不數漢臣才

莆田方沆督學滇中有西巡過祿豐詩千山開井邑隴

畝報年豐籬落晴烟外  
檐帷嶺樹中疎花秋自發  
絕壁路仍通淒斷登臨恨  
闌雲半畝宮又捨資驛讀  
垂柳篇懷楊用修太史詩  
嗟爾承明供奉年投荒萬  
里主恩偏詞林雅擅穿楊  
技荒徼空傳垂柳篇過客  
西風頻駐馬郵亭落日自  
啼鵲卧觀遺跡淋漓處彷彿  
龍蛇畫起烟又龍尾關天生橋詩  
蒼嶺青未了寒烟野戍平  
危梁通地脈削壁類天成  
霜色孤鴻暝濤聲萬馬行  
昔年曾割據形勝控榆城  
又蒲陀崆詩尋源

聞黑水百折此山隈  
鳥道雙旌轉陰厓  
一線開奔濤  
疑聚雪觸石忽喧雷  
為別東流性南溟  
去不迴又過  
永昌城南諸葛營  
詩諸葛行營地  
晨征野望微名垂  
滇日月雲閃漢旌  
旗霽色川原闊  
清時壁壘稀采風  
聞父老猶自說天威

閩司空林如楚蒼山圖歌  
吾聞點蒼名山乃在哀牢之  
北鶴川之東勢與碧雞金馬  
相爭雄歸基盤礴三百  
里上架井絡摩蒼穹  
帝遣蒼山君下鎮坤戶  
為愚公



夸娥有力不得舉至今嶄絕蠻夷中夕嵐朝靄窈窕  
而蔥龍錦屏障斷西南風屏端十九峰一一肖芙蓉  
初疑翠鬟參差明鏡裏又驚睥睨連雲起巫陽十二  
九華九嶷缺巒崎安足擬上有靈湫長寂寥琳宮寶  
剎山之腰紫蒲仄岸人難掇殘雪深林寒不消四時  
龍氣作微雨但覺颯漚松泉飄奔流却投西洱海波  
光萬頃堆瓊瑤赤崖玉案何么麼有似數點青萍漂  
誰令顧虎頭寫此白團扇可憐咫尺間攢峰如眼見

西曹隱吏懷仙客  
齋中提攜滿幽色  
翫之不減點蒼石  
真山真水真奇瑰  
我昔對之心顏開  
今朝把圖重歎息  
始知靈根千劫凝  
真胎維嶽生申變  
幻亦如此不爾邨得  
藩宣為翰才吁嗟乎  
名山歲晚長崔嵬  
尚平多累胡為哉  
藜節芒屨生塵埃  
我無凌風翼矯首  
空徘徊會借擲金  
孫綽筆為君乘興  
賦天台

福唐薛夢雷到滇詩  
迢迢使節赴昆明  
一別乾坤萬里程  
吳楚褰帷江月曉  
黔沅飛旆嶺烟晴  
五華雨過春

長在列栢風來暑自清金碧山川時極目燕閩雲日  
總關情又泛昆明池憩羅漢寺詩昆明池上碧山頭  
此日登臨霽色收烟曉佛燈蘿薜洞雨來官舸杏花  
洲危崖絕頂浮金馬巨浪中流起白鷗千頃風波堪  
縱目誰憐身世轉悠悠送漆兵憲城屯猛卯城蠻烟  
瘴雨十年餘憲府天恩下玉除霜署新持金馬節雪  
山仍擁畫熊車城臨雄鎮關逾壯地闢龍荒餉未虛  
報主險夷君莫問朝廷原有紀功書送沐都護西征

詩傾城士女擁行旌都護爭看出漢營開鎮十朝雄  
將略登壇萬里肅軍聲白猿玉劒秋霜淨朱鷺金鐃  
夜月明不待華山歸馬日彩毫先為賦西征

汝南李叔茂本固巡按滇中有楚雄道中詩山行亦不  
惡疎雨夜來過祇覺峰巒秀誰云瘴癘多人家依水  
竹僧寺隔烟蘿越嶺分林莽遙聞伐木歌又悠悠持  
使節日日遶山行跋涉吾須倦登臨眼自清巖花爭  
媚客谷柳暗啼鶯落日松杉外蒼茫見楚城春日雲

泉山寺詩何處登高可當歸雲山亭寺坐霏微披林  
便覺塵心遠把酒平分爽氣飛谷裏鶯聲頻遞籟巖  
頭蘿薜巧裁衣晚來目極寒烟外幾點冥鴻帶落暉  
天生橋觀浪詩攢崖偈仄鬱崔嵬誰鑿玄關一竅開  
力士峽中驅石起靈鼇海上駕山來浪花晝捲千層  
雪濤勢晴喧萬壑雷鎖鑰西南形勝在分符須仗不  
凡才龍尾關詩蒙王此割據形勝亦奇哉驚嶺排雲  
入龍關倚劔開霸圖猶在眼戰骨已成灰落日秋原

外悲風動草萊

潯陽萬畝存嗣達分守金滄夏日署中書懷詩四首朝  
來退食後虛室靜無喧樹古叢蒼鼠巖高蹲老猿海  
風侵市冷山霧壓林昏伏日猶重袷寒暄可共論負  
乘來滇國探竒問洱蒼關仍嚴虎豹節已愧羔羊厭  
苦馳邊檄浮沉歷瘴鄉音書秋後杳歸鴈隔衡陽南  
中車騎少成我寡交遊宦况悲道景鄉心怵早秋懶  
從靈鵲喚閑任好雲留欲擬江南賦開軒問斗牛陰

易惟吾適東西任所之無文空諭蜀垂老更居夷窺  
鏡羞蓬鬢橫金負素絲此中多勝地杖策且稽顙遊  
三塔寺得十二韻勝地標三塔叢林入萬松鐸隨天  
籟發影混嶽雲封世界光牟照浮圖秘鬼工僧貧閒  
掛衲地靜遠聞鐘古剎顏金象遙空下玉龍燈傳靈  
鷲嶺香辨點蒼峰海夜潮音沸山陰法梵重烏蠻饒  
釋國丹洞幾仙踪炎夏銷煩劇長秋縱懶慵水田栽  
舊式鹿苑戀清供慧遠欣同趣玄暉喜見逢偶從林

靖人因悟勝因宗

天台王士性點蒼山歌點蒼山高躡空連峰十九如掛  
弓峰峰流泉落澗底下浸榆葉涵山東高山積雪照  
人眼六月吹墮隨罡風寒光飛翠迸馬首太陰顓氣  
摩蒼穹我聞點蒼有奇石胡自山蒼石還白豈是陰  
崖太古雪化作瑤華點空碧玉宇瑤樓互終古影落  
榆河驚水府驪龍弄珠蛟起舞吐炬燃天作風雨洪  
濤不沒大鵝洲瞥然大地如欲浮四時變態更譎幻



深山巨澤良悠悠我欲乘風御列缺排雲直踏中峰  
裂珊瑚出水月未高倦來且嚼山頭雪又同吳張二  
憲使登九鼎山歌君不見巴西吳使君君家九峰號  
凌雲三嵒隱隱天際分又不見沅陵張仲子君家九  
疑隔湘水白雲盡入蒼梧裏就中九鼎亦巔岼五雲  
自昔稱奇觀竭米選勝正陽九北風吹鴈天宇寬白  
衣望斷黃花老落落長松翠色寒疎櫺朗月照清夜  
大壑噫氣搏林端燕壘蜂房嵌空碧清磬一聲天咫

尺秋旻欲化無羽翼仰頭好把雙星摘君為我浩飲  
我為君朗吟烏帽籠頭吹不落杖底青山知我心醉  
睨點蒼山上雪手撲飛花和酒咽又昆明泛舟宿太  
華山縹緲樓詩高秋風雨欲西來秀拔三峰掌上開  
半浸混茫分野色平臨紫翠落城隈洪濤漲處無烟  
嶼青海翻時有劫灰共道風光天外盡誰看咫尺在  
蓬萊又登山臨水為誰留蓼白蘋青起暮愁萬頃濤  
聲行木末千尋嶽色倚池頭石鯨不見秋風動金馬

來追夜月遊何限乾坤蕭瑟意依然縹緲一飛樓

番禺郭棐為滇右轄遊陟名勝題詠不絕其秋日遊湧

泉寺詩天開寶剎凌雲出地湧珠泉抱寺流龍氣光

銜祇樹曉鶯花紅映綺園秋共凭罨畫調鸚鵡醉倚

闌干望斗牛笑問巖前飛瀑水幾時還作曲觴遊中

秋讌集詩壁月盈盈夜金風澹澹秋榆花當席照桂

影滿庭流把袂來金碧傳杯近斗牛共酣滇海飲不

數武昌樓登太華山寺詩南甸名山雄寓內諸公佳

興共夷猶會探滇海無邊景先向華峰絕頂遊四野  
黑雲山似墨滿天紅雨客登樓此中氣候由來早六  
月涼風恰是秋

閩鄧原岳澂江道中詩歲晚厭行役單車豈遑處衾冷  
不成寐出門復何許雪霽天色寒風急江聲怒何處  
落梅花徘徊日將暮過玳瑁嶺詩灌木千章合巖花  
三月深泉聲盤嶺急雲氣結林陰駐幰方危磴褰帷  
復遠岑嵐光添秀色霧縠發清音不盡搜羅興其如

汗漫心計程無百里問徑有千尋擁腫圍奇樹鉤輅  
語怪禽未須愁瘴癘頗已愜登臨西塞狼烟定南天  
鴈羽沈嘯歌還不廢聊此散煩襟過華亭寺讀方子  
及碑詩載酒尋僧席屢移春山何處不相宜琉璃影  
散天花落金碧光搖法鏡垂地近西方開竺國烟銷  
下界瞰昆池栖霞片石應堪語苦憶南朝江總持同  
漆使君宿九鼎蘭若詩九鼎山頭列九峰雲間幻出  
碧芙蓉香林寶閣僧廬淨疊嶂懸崖佛剎重夜靜泉

聲時雜磬天陰嵐氣欲迷鐘憑君遍說諸名品可是  
南宗與北宗

吳郡馮時可分巡大理僅九閱月以祝釐去其白水關  
驛對月詩淺山曳輕雲茂林鬱深碧夜氣涼如水當  
牕迎皓魄露華洗空氣清暉流几席已欣鳥道脫尚  
恨鴛樓隔抱影獨寤寐銜恩感今昔天宇本自寬人  
生胡自窄萬里遊亦奇百城臨且適當劇即程書乘  
閒亦振屐悠然如在林孤臣何跼蹐登葉榆城詩命

駕初尋寺沿城更上樓白雲爭岫起碧水與天浮汗  
漫遊應遠蹉跎歲且秋長安何處望佇立思悠悠點  
蒼山詩蒼崖點霄漢隨照映孤城晴雪歲時積奇雲  
日夕生龍蛇依石卧鸛鶴傍松鳴十八溪分注家家  
環珮聲

豫章鄧漢以侍御按滇所至題詠殆遍其姚安道中詩  
山霧四塞烟霏微林深箐密人行稀青蛉川北日初  
霽弄棟城頭雲亂飛映水鳬茈故寂歷迎風燕麥相

因依故鄉節候復誰記五月南中猶袷衣盤龍山寺  
遊矚詩勝地不迴車將貽山靈謂况值冬景霽乘高  
展清眺涉澗漱潺湲蹙蘿陟窈窕楚宛浮翠含桃  
靜宜笑

此景在冬惟  
滇中有之

泉香泄暗竇巖光發幽竅花龕

據峰腹茲焉得佳要俯睇漸微茫仰攀益孤峭幽賞  
如素期沈疴即已療尸曠詎因斯竊欲辭廩料人日  
登太保山詩太保山頭七日春邊城景物迴愁人甲  
兵未解銀生戍耕種纔餘漆齒民地險風烟迷大候



天清楊柳映蘭津登高倍切思歸嘆恰數離家二載  
身泛西洱河詩觴豆笙歌載兩頭春風徐漾木蘭舟  
魚龍徙族聞中夜蒲柳分行辨四洲弓月全臨隄影  
出蓮峰遙學浪花浮清尊滿泛空明色宛在蒹葭白  
露秋重入碧雞關詩碧雞關頭雞早鳴碧雞山下車  
彭彭車塵起處見芳草云是秦時五尺道出亦從此  
關入亦從此關麥秀漸漸雉子斑斑衝寒獨往今始  
還君不見路傍山躑躅巨於赤茸鞞宛轉當馬頭爾

非孔氏徒胡為轍環卒不休男兒不習異鄉味空誚  
衣冠楚沐猴

閩布衣徐勣豫章送謝在杭之滇二首彭蠡湖邊惜解  
攜星軺遙指夜郎西天書日下銜丹鳳山色雲中見  
碧雞南甸諸蠻金裹齒東方千騎鍊為蹄官閒到處  
堪吟嘯洱海年米靜鼓鼙又纍纍金紫已垂身六詔  
分藩簡重臣文比王褒堪奉使詩工謝朓動驚人雲  
光五色皆成彩天氣經年總似春手版支頤朝爽入

點蒼如黛絢嶙峋

閩曹觀察學佺送謝在杭參滇藩詩萬里滇南國迢迢  
使節臨親朋稀見面夷漢共傾心有水皆名海無花  
不作林碧雞金馬跡到日一搜尋

南昌楊春茂巡按滇中有遊青華洞詩迢遞問青華迂  
迴一逕斜洞天晴滴雨海色曙來霞聽樹簫鳴玉飛  
杯酒送花勝情遊未已前路報猶賒又天生橋詩誰  
謂河無梁天生古渡長雙虹梯兩岸一水竇中央蒼

石流雲潤梅花濺玉香橋頭峰峭壁曾此繫名王又  
鐵索橋詩一水銀河迴千尋鐵索通填成疑駕鵲懸  
度擬飛虹過客喧馳馬真人冷御風蒼烟籠石壁天  
地永神功

閩布衣陳鴻寄謝在杭先生叅滇藩詩南行萬里奉新  
恩徼外方知岳牧尊六詔星辰隨擁傳五華烟月對  
開軒路通密箐蠻居異山枕荒祠漢甸存應有彩雲  
供灑翰朝朝飛傍紫薇垣

滇中掌故則漢陸賈南中行記一卷 楊終子山哀牢

傳一卷 晉常璩南中志一卷 嵇含南中草木狀

一卷 唐李克雲南風俗記一卷 韋臯西南夷事

狀十卷 袁滋雲南記五卷 韋齊休雲南行紀二

卷 樊綽雲南志十卷南蠻記十卷 徐雲虔南詔

錄三卷 賈滂雲南別錄一卷行記一卷 李德裕

西南備邊錄十二卷 韓文白古通一卷 宋辛怡

顯天禧雲南錄三卷 元郭松年南詔行紀一卷

李京雲南志略四卷 張道宗古滇說原集一卷

明王奎南雲稿二卷 李思聰百夷傳一卷 韓宜

可南雲稿二卷 楊鵬南詔通紀十六卷 楊慎滇

載記一卷滇程記一卷南中集十卷 倪輅南詔野

史一卷 吳懋葉榆檀林志八卷 陳善黔南類編

十卷 彭汝實六詔紀聞一卷 田汝成炎徼紀聞


二卷 顧應祥南詔事略一卷 郭棐炎徼瑣言四

卷 鄧漢南中集四卷 鄧原岳碧雞集一卷 薛

夢雷彩雲篇二卷 馮時可滇南稿二卷 陳用賓

脩攘備考二卷 太保山樵逸緬甸始末二卷 諸

葛元聲滇事紀略十四卷



滇略卷八